

《無量壽經優婆提舍願生偈》 補充講表

◎附表十：

○五念門（以下糅合《往生論註》）

◆門者，入出義也。如人得門，則入出無礙。前四念，是入安樂淨土門。後一念，是出慈悲教化門。

○云何禮拜？身業禮拜阿彌陀如來、應、正遍知，為生彼國意故。（以下糅合《往生論註》）

◆諸佛如來，德有無量；德無量故，德號亦無量。若欲具談，紙筆不能載也。是以諸經或舉十名，或騰三號，蓋存至宗而已，豈此盡耶！

○如彼如來光明智相，如彼名義，欲如實修行相應故。（以下糅合《往生論註》）

◆如彼如來光明智相者：佛光明是智慧相也。此光明照十方世界，無有障礙，能除十方眾生無明黑闇，非如日月珠光，但破空穴中間也。

◆如彼名義，欲如實修行相應者：彼無礙光如來名號，能破眾生一切無明，能滿眾生一切志願。然有稱名憶念，而無明猶在，而不滿所願者。何者？由不如實修行，與名義不相應故也。云何為不如實修行，與名義不相應？謂不知如來是實相身，是為物身。又有三種不相應：一者信心不淳，若存若亡故。二者信心不一，無決定故。三者信心不相續，餘念間故。此三句，展轉相成。以信心不淳，故無決定；無決定故，念不相續；亦可念不相續，故不得決定信；不得決定信，故心不淳。與此相違，名如實修行相應。是故論主建言我一心。

問曰：名為法指，如指指月。若稱佛名號，便得滿願者。指月之指，應能破闇。若指月之指，不能破闇；稱佛名號，亦何能滿願耶？

答曰：諸法萬差，不可一概。有名即法，有名異法。名即法者，諸佛菩薩名號，般若波羅蜜，及陀羅尼章句，禁呪音辭等是也。如禁腫辭云：日出東方，乍赤乍黃等句。

假使酉亥行禁，不關日出，而腫得差。亦如行師對陣，但一切齒中誦「臨兵鬥者，皆陳列在前」。行誦此九字，五兵之所不中，抱朴子謂之要道者也。又苦轉筋者，以木瓜對火，熨之則愈。復有人但呼木瓜名，亦愈。吾身得其效也。如斯近事，世間共知，況不可思議境界者乎！滅除藥塗鼓之喻，復是一事，此喻已彰於前，故不重引。有名異法者，如指指月等名也。

※《妙法蓮華經觀世音菩薩普門品》云：「觀世音菩薩，以何因緣，名觀世音？佛告無盡意菩薩：善男子！若有無量百千萬億眾生，受諸苦惱，聞是觀世音菩薩，一心稱名，觀世音菩薩即時觀其音聲，皆得解脫。」

※《大乘起信論裂網疏》卷第五云：「問：但離心垢，便見法身，何須念佛、觀佛、稱名、禮拜等？答：佛是先證我心性者，念之、觀之、稱之、禮之，皆是除心垢之妙方便也。」

※《佛說阿彌陀經要解》云：「阿彌陀，正翻無量，本不可說。本師以光、壽二義，收盡一切無量。光則橫遍十方，壽則豎窮三際；橫豎交徹，即法界體。舉此體作彌陀身土，亦即舉此體作彌陀名號。是故彌陀名號，即眾生本覺理性。持名，即始覺合本。始本不二，生佛不二。故一念相應一念佛，念念相應念念佛也。」

※《彌陀要解》云：「當知離卻現前一念無量光壽之心，何處有阿彌陀名號（西方依正莊嚴）；而離卻阿彌陀名號（西方依正莊嚴），何由徹證現前一念無量光壽之心。願深思之！願深思之！」

※蓮池大師於《彌陀疏鈔》云：「託彼名號（西方依正），顯我自心。」

※《占察善惡業報經義疏》云：「諸佛菩薩真實功德，通別名號，並由證真實性，稱性所成緣起作用，能與眾生作增上緣。眾生不了，計有心外佛菩薩名，即為淨分分別性攝。若知名號，是我自心所現相分，即為淨分依他性攝。能於一切時處常勤誦念，勿令間斷，則心不散亂，名為妙止；

名號歷然，名為妙觀，便可助顯唯心識觀，兼有滅障勝功能矣。」

○欲如實修行奢摩他故（以下糅合《往生論註》）

◆譯奢摩他曰止。止者，止心一處，不作惡也。此譯名乃不乖大意，於義未滿。何以言之？如止心鼻端，亦名為止。不淨觀止貪，慈悲觀止瞋，因緣觀止癡，如是等亦名為止。如人將行不行，亦名為止。是知止語浮漫，不正得奢摩他名也。如椿柘（音這）榆柳，雖皆名木，若但云木，安得榆柳耶？奢摩他云止者，今有三義：

- 一者、一心專念阿彌陀如來，願生彼土。此如來名號，及彼國土名號，能止一切惡。
- 二者、彼安樂土，過三界道。若人亦生彼國，自然止身口意惡。
- 三者、阿彌陀如來正覺住持力，自然止求聲聞辟支佛心。

此三種止，從如來如實功德生。是故言：欲如實修行奢摩他故。

○欲如實修行毘婆舍那故（以下糅合《往生論註》）

◆譯毘婆舍那曰：觀。但汎言觀，義亦未滿。何以言之？如觀身無常、苦、空、無我、九

想等，皆名為觀。亦如上木名，不得椿柘也。毘婆舍那云觀者，亦有二義：

一者、在此作想，觀彼三種莊嚴功德。此功德如實故，修行者亦得如實功德。如實功德者，決定得生彼土。

二者、一得生彼淨土，即見阿彌陀佛；未證淨心菩薩，畢竟得證平等法身。與淨心菩薩與上地菩薩，畢竟同得寂滅平等。是故言：欲如實修行毘婆奢那故。

○心常作願迴向為首，得成就大悲心故。（以下糅合《往生論註》）

◆迴向有二種相，一者往相。二者還相。往相者：以己功德迴施一切眾生，作願共往生彼阿彌陀如來安樂淨土。還相者：生彼土已，得奢摩他毘婆舍那方便力成就，迴入生死稠林，教化一切眾生共向佛道。若往若還，皆為拔眾生渡生死海。是故言：迴向為首，得成就大悲心故。